



**Komunikadu Imprensa**  
**14 Jullu 2021**  
**Parlamentu Nasionál**

## **JSMP konsidera valór alsada ne'ebé prevee iha proposta Lei Organizasaun Judisiária sei relevante ho situasaun ekonómia povu nia**

Komisaun A Parlamentu Nasionál (PN), iha durante loron 3 (tolu), hahú 07-09 Jullu 2021, halo diskusaun no votasaun iha especialidade ba esbosu Lei Organizasaun Judisiária ne'ebé durante ne'e tama iha pakote lei sira iha planu reforma judisiária nian.

Iha diskusaun ne'ebé lidera husi Prezidente Komisaun A deputadu Joaquim dos Santos "Boraluli" no hetan partisipasaun másimu husi autór judisiáriu sira instituisaun sira setór justisa nian hanesan Tribunál, Ministériu Públiku, Defensór Públiku no Advogadu Privadu, inklui Ministériu Justisa nu'udar proponente ba Proposta Lei Nú. 28/V/3<sup>a</sup> kona-ba Organizasaun Judisiária.

Iha intervensaun juis sira nian relasiona ho Artigu 24 kona-ba valór alsada, juis sira konsidera valór alsada US\$1,000.00'- ne'ebé prevee artigu ne'e no mós iha pontu 1) Artigu 917 Kodigú Prosesu Sivíl (KPS) la kondiz ona ho situasaun ekonómika agora no haree mós ba gastu ka despeza ne'ebé tribunál hasai relasiona ho valór materiál kazu sira hanesan ne'e. Nune'e sira husu atu aumenta tan nia valór alsada ne'e ba US\$3,000.00'- ba leten no ba rekursu US\$5,000.00'- ba leten. Provizaun pontu 2) Artigu 917 KPS nian prevee mós katak asaun sivíl sira ne'ebé nia valór aas liu US\$1,000.00'- bele halo rekursu, se la liu husi valór ida ne'e sei la halo rekursu.

"JSMP hanoin katak lei ne'e tenke asegura no promove ema hothotu nia direitu fundamental asesu ba justisa, nune'e lei ne'e bele refléta ho di'ak interese povu tomak nian, la'ós grupu ki'ik ida de'it. Atu bele asegura no promove ho di'ak direitu sira ne'e, lei ne'e labele haree no valoriza de'it valór materiál, maibé valór la'ós materiál hanesan sente kontente ka satisfaz husi parte sira buka justisa ne'e tanba hetan justisa ida ne'ebé justu. Iha parte seluk, bainhira haree ba realidade ne'ebé iha no tuir rezultadu peskiza no relatóriu sira hatudu katak maioria populusaun Timor-Leste moris iha ki'ak estremo, la'ós ki'ak de'it no tuir peskiza ida kona-ba Índise Globál kona-ba Hamlaha iha 2020<sup>1</sup>, Timor-Leste tama iha kategoria nasaun número 10 ne'ebé sofre hamlaha ho valór aas liu (37.6) Afeganistaun no Sudaun no iha

---

<sup>1</sup> Detallu bele haree iha relatóriu ne'e: <https://www.globalhungerindex.org/pdf/pt/2020.pdf>

gráfiku hatudu kór mean ka aat liu<sup>2</sup>. Nune'e, JSMP konsidera valór alsada ne'ebé fixa ona iha Artigu 24 esbosu Lei Organizasaun Judisiária no Kódigu Prosesu Sivíl sei relevante tuir situsaun ekonómika no finanseira povu Timor-Leste nian no laiha nesesidade atu halo alterasaun iha tempu ida agora. Tanba maioria populusaun valór ida US\$1,000.00'- boot kompara ho grupu ki'ik ida ne'ebé iha kondisaun ekonómika no finanseira di'ak. Bainhira hasa'e tan valór, ne'e signifika katak lei ne'e taka dalan ba ema barak atu asesu ba justisa", dehan Diretora JSMP, Ana Paula Marçal.

Iha monitorizasaun JSMP nian kazu barak ne'ebé julga iha tribunál deskobre katak bainhira juis sira husu arguidu sira-nia rendimentu kada fulan husi arguidu sira sempre hatan ho nia valór orsamentu ne'ebé menus husi US\$100.00'- no kada loron susar atu hetan osan ho nune'e JSMP konsidera Artigu 24 mantein ho proposta Governu nian.

Iha parte seluk, JSMP konsidera esbosu Lei Organizasaun Judisiária ida ne'e importante no nu'udar lezislasaun primeiru Timor-Leste nian kona-ba organizasaun judisiária. Lei ida ne'e bele revoga ona Regulamentu UNTAET Nú.11/2000 Marsu no Regulamentu Nú.25/2001 kona-ba Organizasaun Judisiária tranzitóriu. Lei ne'e mós bele loke dalan ba Governu hodi estabelese tan tribunál sira iha teritóriu nasional tuir área administrativa idaidak nian atu nune'e bele hatan ba preokupsaun povu nian no asegura ho di'ak liután direitu ema hothotu nia atu asesu ba justisa formál.

Proposta Lei ne'e, Komisaun A, PN halo ona diskusaun no votasaun hodi aprova ona artigu hamutuk 23 no sei kontinua filafali iha 15 Jullu 2021, nafatin iha Munisípiu Aileu.

Partisipante sira iha diskusaun ne'e mak Prezidente Tribunal Rekursu Meritísimu juis Dr. Deolindo dos Santos, Meritísima juiza Dra. Maria Natércia G. Pereira no Meritísima juiza Dra. Edite Palmira dos Reis, Ministru Justisa, Representante Prokuradór Jerál Repúblika Exelénsia Dra. Angelina Saldania no Eis-Prokuradór Jerál Exelénsia prokuradór Dr. Jose Ximenes no Koordinadór Defensoria Públiku Jerál Exelénsia Dr. Cancio Xavier, inklui Representante advogadu Timor Leste Dr. Jose Guterres no Eis-Ministra Justisa Dra. Lucia Brandão Lobato.

Atu hetan informasaun liután favór kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Website: <http://jsmp.tl>  
[www.jsmp.tl](http://www.jsmp.tl)

---

<sup>2</sup> Informasaun detallu bele haree iha artigu ida husi World Socialist ne'e:  
<https://www.wsws.org/pt/articles/2019/09/10/timo-s10.html>